



Гебархошка яздина кехат

Шайна еш йолу дуьхьало алсамъяларна, Иийсах тешарх дІакъаста дагахь йолчу цъхана динан тобане хъажийна дара *Гебархошка яздина кехат*. Яздархочо уьш церан тешарехь иракараХиттабо, Дала леррина кьобалвина Иийса бакъдолу а, тІаьхъара а Дала гучудаьккхинарг дуй чІагІ а деш. Цо дуьйцуш кхо бакъдерг ду: 1) Иийса Делан даим ве-хаш волу КІант ву. Ша лайначу баланашкахула стигаларчу Дена муь-тІахь хила Іемира Иза. Делан КІант хилча, хьалхарчу бертан* пайхамарел а, маликел а, Мусал шел а лакхара ву Иийса. 2) Дала билгалдаьк-кхира, Иийса массо а ханна динан да ву аьлла. Цундела Иза хьалха бинчу бертан динан дел лакхара ву. 3) Иийса бахъана долуш, Цунах тешаш верг кьинах а, кхерарх а, валарх а кІелхьарваьккхина ву. Ткъа динан коьрта да волчу Иийсас бакъдолу кІелхьардаккхар ло. Гебар-хойн динан гІиллакхаш а, дийнатийн саГІанаш а бакъдолчун ИиндагІ бен дацара.

Исраилхойн исторехь хиллачу цъаьболчу цІеяханчу нехан тешаран масалш тІе а тухуш (ІІ-гІа корта), яздархочо иракараХиттабо дешархой, кхидІа а тешаме хилийтархъама. Иийсага а хьобжуш, тешаме хила безаш бу уьш, шайна тІехь мел болу баланаш а, Іазапаш а ловш, чаккхе тІеяллагц. Тептаран чаккхенехь цъаьболу хьехамаш а, дІахье-дарш а ду.

Шен КІантехула долу Делан дош

1 ¹Хьалха Дала дукхазза а, тайп-тайпана а дийцина вайн дайшка пайхамаршкахула, ²ткъа кху тІаьхьарчу деношкахь Шен КІантехула дий-цина Цо вайна. Дерриге а кхочун долу Цуьнан КІант ву дІахІоттийна. Цуьнгахула массо хІума а кхоьплина. ³КІант Делан сийлаллин нур а, Делан билгал долу васт а ду. Шен нуьцкъалчу Дашца дерриг а латтадо Цо. Шегахула адамаш кьинойх а цІандина, стигалшкахь Веза Воккхачунна аьтту агІор охьахиина Иза.

* *Хьалхара барт* – Дала Исраилан халкъаца дуьхьара бина барт.

Делан КІант маликел а лакхара ву

⁴Цунна тиллина цІе маликашна тиллинчул лакхара хиллал, царал ла-кхара ву Иза. ⁵ХІунда аьлча Маликех хьаьнга аьлла Дала:

«Хьо Сан КІант ву,
тахана Сох Хьан Да хилла?»

Кхин а:

«Со Цуьнан Да хир ву,
Иза Сан КІант а хир ву?»

⁶Шен дуьхьарлера Добзалхо дуьнен чу воккхуш, Дала элира:
«Делан массо а маликаш Цунна хьалха охьатаИийла».

⁷Маликех лаьцна Цо аьлла:
«Дала Іаьнарх Шен маликаш до,
цІеран алунех Шен ялхой бо».

⁸КІантах лаьцна Цо аьлла:
«Хьан олаллин гІант, Дела, абаденналц лаьтта,
Хьан паччахьалла нийсонан паччахьалла ду.

⁹ Хьуна бакъдерг дезна, ткъа харцо ца езна,
цундела Дала, Хьан Дала,
къобалвеш тІедутту даьтта санна,
Хьан накъосташна чул
Хьуна алсам казахетар делла».

¹⁰Кхин а аьлла Дала: «Веза Эла, Ахь юьхьанца латта кхоьплина,
Хьайн куьйгашца стигал а йина.

¹¹ Уьш дІадевр ду, ткъа Хьо вуьсур ву.
Дерриг а тишлур ду, бедар санна.

¹² ТІеюху хІума санна, Ахь дІахьарчор ду уьш,
тІаккха уьш, бедар санна, хуьйцур ду.
Амма Хьо цкъа а хийцалур вац,
Хьан дахар чекх а дер дац».

¹³Маликех хьаьнга а, маца а аьлла Дала:
«Охьахаа Суна аьтту агІор,

Аса Хьан мостагІий Хьан когашка охьабахккалц?»

¹⁴Далла Гуллакх деш долу синош дац ткъа маликаш, кІелхьардовлар кхочун долчарна гІуллакх дан дахкийтина дац ткъа уьш?

^{1:5} Забур 2:7; Дауд 7:14; 1 Шерашкахь 17:13. ^{1:6} Карлабаьккхинарг 32:43 (Грекийн).

^{1:7} Забур 103:4 (Грекийн). ^{1:8, 9} Забур 44:6, 7. ^{1:10-12} Забур 101:26-28 (Грекийн).

^{1:13} Забур 109:1.

Сийлахь келхардовлар

2 ¹Цундела ваьшна хезначунна къаьсттина чIогIа тидам тIебохуйтуш хила деза вай, тешарх хера ца довлархьама. ²Нагахь маликашкахула аьлла дош чIогIа а хилча, муьлххачу зуламна а, лацадогIарна а таIзар деш а хилча, ³таIзарх муха девр ду вай, оццул сийлахьчу кIелхардовларх ца дашахь? И кIелхардовлар цкъа хьалха Везачу Эло дIакхайкхийра, цул тIаьхьа Иза хезнаболчара иза бакъ хилар вайна чIагIдира. ⁴И дерриге а тамашийнчу хиламашца а, билгалонашца а, тайп-тайпанчу ницкъашца а Дала тIе а чIагIдира, Шен лаамца Шен Са дIаса а даржош.

КIелхардовларан баьчча

⁵Маликийн дола ца даьккхина Дала вай дуьйцуш долу хиндолу дуьне. ⁶Мелхо а, Делан Йозанашкахь цхьанхьа цхьаммо тоьшалла дина:

«Стаг мила ву, Хьан цуьнан бала кхача?

Адаман кIант мила ву, Ахьа цуьнан гIайгIа бан?

⁷ Цхьана ханна маликашна хьалха лахви Ахьа иза.

Юха, сийлаллин таж а делла, вазвина иза*.

⁸ Дерриг а цуьнан когашка охьадилли Ахьа».

Дерригенна а тIехь цуьнга олалла дайтича, Дала цуьнан кара ца дерзош хIумма а ца дитина. Ткъа цкъачунна тхуна ца го дерриг а цуьнан карахь хилар. ⁹Амма тхуна гург Ийса ву. «Цхьана ханна маликашна хьалха лахвина» вара Иза, ткъа хIинца, Иожалла тIеэцарна, «сийлаллин таж а делла, вазвина ву Иза». Иза иштта лелла, Дала маьхза дина дика бахьана долуш, дерриге а адамиин дуьхьа кхалхархьама. ¹⁰ХIунда аьлча дерриг а Шен дуьхьа а, дерриг а Шегара а Долчунна товш дара, дукхахберш сийлаллина тIеобьдучу новкъахула а буьгуш, уьш кIелхарбохуш волу Баьчча баланех чекхвакхар.

¹¹Нах базбеш Верг а, базбеш берш а Цхьаннах схабевлла бу, цундела Цунна эхь ца хета царах вежарий ала. ¹²Цо боху:

«Хьан цIе Сайн вежаршна кхайкхор ю Аса,

Хьуна хастам бийр бу Аса динан гуламе
баьккинчарна хьалха».

¹³Кхин а боху Цо:

«Со Цунах дегайовхо йолуш хир ву».

Кхин а:

«ХIара Со а, Дала Суна делла бераш а ду».

* ^{2:7}...вазвина иза. Цхьадолчу тептарш тIехь: *Айхьа диначунна тIехь куьйгалла дан ХIоттий иза.*

¹⁴И бераш дилханах а, даьIакхех а лаьтгаш ма-хиллара, Иза а хилира уьш санна, Шен кхалхарца Иожаллина тIехь ницкъ болу иблис эшорхьама а, ¹⁵Иожаллех кхоьруш, дерриге а шайн дахарехь лоллехь баьккиннарш паргIатбахархьама а. ¹⁶ХIунда аьлча, гуш ду-кх, маликашна гIо ца до Цо, амма ИбрахIиман тIаьхьенна гIо до. ¹⁷Цундела дерригенна а тIехь Шен вежарех тарвала везаш вара Иза, Далла хьалха къинхетаме а, тешаме а динан коьрта да хилархьама. Иштта а хилла, адамиин къиношна гечдайта таро яра Цуьнан. ¹⁸Ша, зен а зийна, баланаш хьегна дела, зуьйш болчарна гIо далур ду Цуьнга.

Ийса Мусал а сийлахь ву

3 ¹Иштта, вежарий, шу Делан долахь дерш а, стигалахь долчун дакъа кхочурш а ду. Цундела Делан Векал а, вайн динан коьрта Да а волу Ийса дагахь латтавелаш. ²Ша ДIахIоттийначунна тешаме вара Иза, Делан цIентIехь Муса тешаме ма-хиллара. ³Ийса Мусан чул а боккха ларам болуш хилла, цIа дийриг ша дечу цIийнан чул боккха ларам бан хьакъ ма-хиллара. ⁴ХIунда аьлча муьлхха а цIа цхьаммо деш ду, ткъа дерриг а динарг Дела ву. ⁵Делан дерриге а цIийнехь тешаме ялхо санна вара Муса. Хинийолчу заман чохь эр долчух тоьшалла дора цо. ⁶Амма Дала леррина Къобалвинарг Делан цIентIехь куьйгалла деш волу тешаме КIант ву. Ткъа Цуьнан цIа вай ду, нагахь вай доьналлица а, тешарца а ваьш сатуьйсучунна тIехь латтахь.

Делан синтем

⁷Цундела, Делан Сино ма-аллара:

«Тахана, нагахь шуна Цуьнан аз хазахь,

⁸ дуьхьал ма довлалаш,
ьяссачу араь шаьш зуьйчу хенахь хамталла еш ма-хиллара.

⁹ Шун дайша Со зийра цигахь,
шовзткъа шарахь Аса мел динарг шайна гиннашехь.

¹⁰ Цундела, царна оьгIаз а вахана, Аса элира:
„Гуттар а шайн дегнашкахь тилабелла бу уьш,
Сан некъаш ца девзина царна”.

¹¹ Цундела Сайн оьгIазаллица Ас чIагIо йира,
синтем лур бу аьллачу метте кхочур бац уьш аьлла».

¹²Иштта, хьовсалаш, вежарий, шайна юкъахь цхьаннан а мекара а, тешар доцу а дог ма хилийталаш, дийна волчу Делах шаьш дIа ца къас-тийтархьама. ¹³Амма хIора дийнахь, вовшашна хьехамаш а беш, динехь чIагIлолаш, «тахана» ала йиш мел хуьлу, хьарамчу хIуманаш Iеа а велла, шух цхьаннан дог юха ца далийта. ¹⁴Дала леррина Къобалвинчун

декъахой ду вай, нагахь юьхъанца хилла долу шеко йоцуш хилар чекх-доллалц вайца хилахь.

¹⁵Делан Йозанашкахь аьлла ду:

«Тахана, нагахь шуна Цуьнан аз хазахь,
дуюьхал ма довлалаш,
яьссачу араьхь шайш зуьйчу хенахь хамталла еш ма-хиллара».

¹⁶Делан аз хезнехь а, хамталла йинарш муьлш бара? Мусас Мисар-махкара массо а арабаьхначарна юкьахь бацара уьш? ¹⁷Хъанна оьгIазва-хана вара Дела шовзткъа шарахь? Къинош а летийна, яьссачу араьхь шайн даьIахкаш охьаехкинчарна ваханерий те Иза оьгIаз? ¹⁸Ла ца доьгIначар-на бен, кхин хъанна дуьхьал аьлла Дала, уьш «синтем лур бу аьллачу метте кхочур бац»? ¹⁹Иштта вайна го, шайн цатешар бахъана долуш, Дала лучу синтеме уьш кхочург цахилар.

4 ¹Дала, Ша синтем лун болчу метте кхачор ду аьлла, йина чIагIо хIинца а йолуш ю, цундела ларлойла вай шуьх цхьаь тIаьхьа ца висийта. ²Исраилхошна санна, вайна а бовзийтина Делан хаза кхаь. Амма иза хезначара цу тIе тешар ца тоьхна, цундела царна пайда ца бина хазачу кхоо. ³Цу хазачу кхоах тешна долу вай кхочур ду Дала синтем лучу метте, хIунда аьлча Цо аьлла:

«Цундела Сайн оьгIазаллица Ас чIагIо йира,
синтем лур бу аьллачу метте кхочур бац уьш аьлла».

Цо иза аьлла, дуьне кхолладеллачу хенахь дуьйна Шен болх чекхбаьлла боллушехь. ⁴Делан Йозанашкахь цхьана меттехь ворхIалгIачу дийнах лаьцна иштта аьлла:

«Цу дийнахь, Ша мел динчу гIуллакхех паргIат а ваьлла,
Дала садаьIира».

⁵Кхин а аьлла Цо хьалха хьахийначу меттехь: «Синтем лур бу аьллачу метте кхочур бац уьш». ⁶Иштта, цхьаберш Дала лучу синтеме кхочур бу, ткъа хаза кхаь хьалха хезна болу вуьш цига кхочур бац, шайш ла ца до-гIарна. ⁷Цундела Дала кхин цхьа де билгалдаьккхина, ткъа цунах Цо олу «тахана». Дуккха а хан яьлча, Даудехула Цо аьллера, лакхахь аьлла ма-хиллара:

«Тахана, нагахь шуна Цуьнан аз хазахь,
дуюьхал ма довлалаш».

⁸Нагахь санна ЮшаIа цу синтеме уьш кхачийнехьара, кхечу дийнах хIумма а аьлла хир дацара. ⁹Делан халкъана ворхIалгIачу дийнан синтем хIетте а буюсу. ¹⁰ХIунда аьлча Дала лучу синтеме кхаьчнарг шен гIуллакхех

паргIатваьлла, Дела Шен гIуллакхех паргIат ма-валлара. ¹¹Иштта оцу синтеме кхача хьовсур вай, цхьа а, вочу масалх пайда а эцна, ла ца догIарна Делах ца къастийта.

¹²Делан дош дийна а, ницкъ болуш а, шина агIор ира долчу туьрал ира а ду. Иза вайна чукхочу, дагах ойланаш а, даьIахкех тIум а дIа а къаьтош. Вайн лаамашна а, дагахь долчунна а кхел йо цо. ¹³Чохь са долу хIума цхьа а яц Делах къайлаььлла, дерриг а ша ма-дарра схьадиллина ду Цуьнан бIаьргашна хьалха. Цунна жоп лур ду вай.

Ийса динан сийлахь коьрта Да ву

¹⁴Стигалшка хьала а ваьлла, Дела волчохь волу динан сийлахь коьрта Да, Делан КIант Ийса, ву вайн, цундела ваьш лелочу динехь леррина лелийла вай. ¹⁵ХIунда аьлча вайн динан коьрта Да кхетар ву вайгара йийлинчу ледарлонех: Иза лаьтта тIехь волчу хенахь, вай санна, массо а тайпана зуьйш хилла, Цо къа ца латийнехь а. ¹⁶Ийса вайн динан коьрта Да волу дела, вай майрра Делан паччахьан гIантана улло даха йиш йолуш ду, Цуьнга-ра къинхетам а, дика а схьаэца, оьшучу хенахь ваьшна гIо дайтархьама.

5 ¹Нахана юкьара хоржуш волу муьлхха а динан коьрта да хIоттаво ада-мийн дуьхьа Далла Iамал ян а, къиноьх тайп-тайпана сагIанаш даха а. ²Динан коьрта да хIума ца хуучу а, галбевллачу а нахаца кIеда хила тарло, хIунда аьлча иза ша а ву ледарлонийн карахь. ³Цундела нахана а, шена а тIера даха деза цо сагIанаш шайш летийначу къиноьх. ⁴Цхьа а шен лаамца хIуттур вац динан коьрта да. Дала тIекхайкхина хила веза иза, АхIарон санна.

⁵Иштта Дала леррина Къобалвинчо а Ша тIе ца эцна динан коьрта да хиларан бакьо. Дала аьлла Цуьнга:

«Хьо Сан КIант ву,
тахана Хъан Да хили Сох».

⁶Делан Йозанийн кхечу меттехь Дала боху:

«Гуттаренна а динан да ву Хьо
Малки-Цадакъин даржехь».

⁷Лаьтта тIехь долчу Шен дахарехь Ийсас чIогIачу белхарца а, бIаьр-хишца а доIанаш а, дехарш а дора Ша Iожаллех кIелхьарваккха йиш Йол-чуьнга. Далла дIахезира Цуьнан доIанаш, хIунда аьлча Ийсан Деле болу ларам боккха бара. ⁸Ша Делан КIант хиллехь а, ерриге а лайначу хало-нашкахула Iемина Иза Далла муьтIахь хила. ⁹Кхачаме хилла, дIахIоттий-на вара Иза, гуттаренна а кIелхьардовларан хьоста хилира Цунах Цунна муьтIахь болчарна массарна а. ¹⁰Малки-Цадакъин даржехь волу динан коьрта да ву аьлла, дIаххайкхийра Иза Дала.

^{3:15} Забур 94:7, 8 (Грекийн). ^{3:16-18} Лелар 14:1-35. ^{4:3} Забур 94:11. ^{4:4} Доладалар 2:2. ^{4:5} Забур 94:11. ^{4:7} Забур 94:7, 8 (Грекийн). ^{4:8} Карлабаьккхинарг 31:7; ЮшаI 22:4. ^{4:10} Доладалар 2:2.

^{5:3} Iамалгьар 9:7. ^{5:4} Арадаккхар 28:1. ^{5:5} Забур 2:7. ^{5:6} Забур 109:4. ^{5:7} Маттай 26:36-46; Марк 14:32-42; Лака 22:39-46.

Динах юхаваларх ларвалар

¹¹ Кхунах лаьчна кхин дуккха а дара дийца, амма хала ду шуна иза тида, хIунда аьлча шу хIуманах иштта меллаша кхета. ¹² ХIинцале а хьехамчаш хила дезаш дара шу, амма шуна юха а Iамо безаш бу Делан дешан дуьх-хьарлера хьехамаш. Шуна хIинца а шура оьшу, чIогIачу кхачанан метта. ¹³ ХIинца а шура юуш верг бакьдерг а, харцдерг а къасторан хьехам безаш вац, хIунда аьлча иза бер долу дела. ¹⁴ Делан дош довзарехь кхийна болчу нахана лерина бу чIогIа кхача. Гуттара а шайн кхетамашца а, хьекьалца а лелаш, уьш Iемира дика а, вон а къасто.

6 ¹⁻² Цундела Дала леррина Кьобалвинчо хьехначух уггар аттаниг дита вай. Вайн ца деза кхин цкъа а хьехаман дух дIахIотто: кьинах дIа-къастарх а, Делаш тешарх а болу хьехам, хих чекхдовларх а, тIе куйгаш дахарх а болу хьехам, веллачуьра денваларх а, гуттар а хин йолчу кхелах а болу хьехам. Тешарехь кхийнчарна лерина болчу хьехамна тIе сихлоила вай. ³ Вай иза дийр ду, Дала вайна магийтахь.

⁴ Йиш яц цкъа хазачу кхоан серло шайна тIе кхеттарш, стигаларчу сов-гIатан чам хиьнарш, Делан Синан зовкх хьобгуш дакъалаьцнарш, ⁵ Делан Дашо луш долу дика а, хин долчу дуьненан ницкъ а безинарш, ⁶ тешарх дIа а къабстина, юха а Далла тIеберзо. Уьш дохкобовларан некъа тIе цхьаьнгге а бахалур бац, хIунда аьлча цара юха а жIарах дIатуху Делан КIант, массарна а хьалха Иза сийсаз а воккхуш.

⁷ Кест-кеста шена тIедогIуш долу догIа дIа а худуш, ша лелош волчунна ялта луш долу латта Дала декьалдеш ду. ⁸ Ткъа баьIаш а, къух а бен шена тIехь ца кхуьу латта Дала неIалт кхайкхорна герга ду. Чаккхенехь иза цIаро дагор ду.

⁹ Иштта оха бахахь а, сан хьоменаш, тхо тешна ду шу дикачу новкъахь хиларх – и некъ кIелхьардовларна тIебоьду. ¹⁰ ХIунда аьлча нийса доцург дац Делехь. Цунна дицлур дац шун гIуллакхаш а, аша Цуьнан нахана то-хара а, хIинца а гIодарца Цуьнга гайтина болу безам а. ¹¹ Тхуна лаьара, шух хIораммо иштта шайн тIедирзина хилар шаьш чекхдовллалц гойтийла, шун сатийсамаш кхочушхилийтархьама. ¹² Мало еш а доцуш, шайн тешарца а, собарца а лур ду аьлларг схьаьбучарах шу тера хила лаьара тхуна.

Делан ваIданаш хийцалург цахилар

¹³ ИбрахIимна Ша ваIда дечу хенахь, Дала Шех дуй буура, Шел лакхара цхьа а воцу дела. ¹⁴ Цо элира: «Аса хьо декьал а вийр ву, хьуна дуккха а тIаьхье а лур ю». ¹⁵ Собарца хьобжуш а Iийна, Дала шена лур ду аьлларг

схьаийцира ИбрахIима. ¹⁶ Наха шайл а доккхачу хIуманах дуй боу, цу дуйно, аьлларг чIагI а дой, муьлхха а къовсам дIабоккху. ¹⁷ Цундела Дала а дуй биьна, Шен лаам хийцалур боцийла Ша ваIда динарг кхочун долчарна дIахайта лууш. ¹⁸ Дала ваIда а дина, Цо дуй а биьна. И ши хIума хийцалур доцуш ду, Дала харцдерг дийца йиш йоцу дела. Цундела Делаволчу девдда дIадахана долу вай чIогIа иракарахIиттийна ду, Дала вайна еллачу дегайовхонна тIехь латтархьама. ¹⁹ И дегайовхо вайн синна онда а, тешаме а зIе ю. Делан стигалийн цIа чохь йолчу кирхьанна тIехьа дIайоьду иза. ²⁰ Оцу езачу меттиге вайл хьалха Iийса вахана, Малки-ЦIадакьин даржехь гуттаренна а динан коьрта да а хилла.

Веза Воккхачу Делан динан да Малки-ЦIадакьа

7 ¹ Малки-ЦIадакьа Шалейм-гIалин паччахь а, Веза Воккхачу Делан динан да а вара. Паччахьашна тIехь толам а баьккхина, цIа вогIуш волчу ИбрахIимна дуьхьал а вахана, иза декьалвира Малки-ЦIадакьас. ² Ша тIамехь мел даьккхинчух уьтталгIа дакъа цунна дIаделира ИбрахIима. Малки-ЦIадакьин цIе ши маьIна долуш ю: цкъа-делахь, «нийсонан паччахь», шолгIа-делахь «Шалейман паччахь», ткъа иза «машаран паччахь» бохург ду. ³ Делан Йозанаша хIумма а ца боху цуьнан дех а, ненах а, гергарчу нахах а, цуьнан дахаран доладаларх а, чаккхенах а лаьчна. Делан КIант санна, гуттаренна а динан коьрта да ву иза.

⁴ Шуна го, шен тоьллачу хIонсах уьтталгIа дакъа ИбрахIима делларг мел сийлахь ву. ⁵ Левин тIаьхьенах болчу динан дайн бакьо ю халкьера цуьнан пайданах уьтталгIа дакъа схьаэца, ИбрахIимах схьабевлла шайн вежарий уьш боллушехь. ⁶ Малки-ЦIадакьас, ша Левин тIаьхьенах вацахь а, ИбрахIимера уьтталгIа дакъа схьа а эцна, Дала чIагIо йина волу иза декьалвира. ⁷ Шеко яц цхьаь декьалвеш верг ша декьалвечул а лакхара хиларан. ⁸ УьтталгIа дакъа схьаьбучуш берш дуьнен чохь бехаш а, леш а болу нах бу, ткъа Малки-ЦIадакьах – иза дийна ву аьлла. ⁹ Ала мегар ду, уьтталгIа дакъа схьаьбучуш волчу Левис ша а ИбрахIимехула и уьтталгIа дакъа делла. ¹⁰ ХIунда аьлча дуьнен чу валаза волу Леви шен ден ИбрахIиман цIийца вара, Малки-ЦIадакьа цунна дуьхьалвеача.

¹¹ Левин тIаьхьенах болчу динан дайшкахула халкьо кхачамалла схьаьбучуш хилча (ткъа цуьнга хьаьбжжина, товрат-хьехамаш халкьана дIабелла), Малки-ЦIадакьин даржехь кхин динан да стенна оьшура, АхIаронан даржехь а ца хуьлуш? ¹² Динан дайн тайпа хийцалуш хилча, Далла гIуллакх муха дан деза дуййцу хьехам а хийцабала безаш бу. ¹³ Вай Вуйцург кхечу тайпанна юкьавогIуш ву, царах цхьа а сагIа доккхучу кхерчана уллохь гIуллакх деш ца хилла. ¹⁴ Хууш ду, вайн Веза Эла ЯхIудан тайпанах схьаваьлла хилар. Ткъа Мусас хIумма а ца аьлла цу тайпанах болчу динан дайн лаьчна.

^{5:12, 13} 1 Коринтхошка 3:2. ^{6:8} Доладалар 3:17, 18. ^{6:14} Доладалар 22:16, 17.

^{6:19} Iамальяр 16:2. ^{6:20} Забур 109:4. ^{7:1, 2} Доладалар 14:17-20. ^{7:5} Лелар 18:21.

Малки-Цадакџин даржехь волу динан да

¹⁵ Иза кхин а чІога билгалдолу, Малки-Цадакџин даржехь кхин динан да гучуваьлча. ¹⁶ Адамийн схьадовлар муха хила деза гойтучу парзашца хилла вац Иза динан да, хедар доцучу дахаран ницкъаца хилла ву. ¹⁷ ХІунда аьлча Цунах лаьцна иштта аьлла:

«Гуттаренна а динан да ву Хьо

Малки-Цадакџин даржехь».

¹⁸ Цхьана агІор хьалха тІедиллина хилла парз дІадоккху, иза ледара а, пайден доцуш а хиларна, ¹⁹ (Мусас беллачу товрат-хьехамо цхьа а хІума кхачамалла йолуш ма ца дерзийна), вукху агІор хІинца вайна лучу дикачу сатийсамо вай Далла гергахьа кхачадо.

²⁰ Дала чІагІо ярца хилла ду и гІуллакх. Вуьш, цхьа а чІагІо ца еш, динан дай хиллехь а, ²¹ Ийса чІагІо ярца хилла, Цунах лаьцна иштта олуш хилча:

«Везачу Эло чІагІо йина,

ткъа цунна тІера юха ца волу Иза:

„Гуттаренна а динан да ву Хьо“».

²² Цунах гуш ду Ийса тоьлладу бертан закълт хилар.

²³ Динан дай дуккха а хилла, хІунда аьлча Іожалло кхидІа шайн гІуллакх ца дойтура цаьрга. ²⁴ Ткъа Ийса гуттар а хиларна, динан дас санна Цо Далла гІуллакх дар а хедар доцуш ду. ²⁵ Цундела Шегахула Далла тІевогІург Цуьнга кхоччуш кІелхьарваккхало, хІунда аьлча Иза гуттар а дийна ву, Цо доІанаш дийр ду Ша кІелхьарбохучарах.

²⁶ Иштта динан коьрта да вайна оьшуш а ву: веза а, бехк боцу а, цІена а, кьинош летийначарах дІакъастийна волу а, стигалал лакха хьалаваьккхина волу а. ²⁷ Динан вукху коьртачу дайн санна, хІора дийнахь цкъа хьалха Шена тІера, юха нахана тІера сагІанаш даха ца деза Цуьнан, хІунда аьлча Цо гуттаренна а цкъа даьккхина сагІа, Ша дІа а велла. ²⁸ Товрат-хьехамца динан коьрта дай кху дуьненан нах хІиттабора, адамийн ледарлонаш церан елахь а. Ткъа товрат-хьехамал тІаьхьа еанчу дуйнан чІагІоно динан коьрта да хІоттийра гуттаренна а кхачаме вина волу Делан КІант.

Вайн динан коьрта Да волу Ийса

8 ¹ Вай дуьйцуш долчунна юкьахь коьртаниг хІара ду: стигалшкахь Веза Воккхачун гІантана аьтту агІор Іаш динан коьрта Да ву вайн. ² Адамо дина а доцуш, Везачу Эло динчу Делан бакъдолчу четар чохь динан коьрта Да ву Иза.

³ Динан муьлхха а коьрта да тайп-тайпана сагІанаш даха дезаш ву, цундела вайн динан коьртачу Ден а хила деза сагІина схьадан хІума. ⁴ ХІинца

Иза лаьтта тІехь вехаш хилча, Иза динан да хир вацара, хІунда аьлча кхузахь болуш бу, товрат-хьехамо ма-бохху, сагІанаш дохуш болу динан дай. ⁵ Цара Далла деш долу гІуллакх кхузарчу четар чохь бен ца хуьлу*. И четар стигалахь долчун кепак тера бен дац, цуьнан ІиндагІ бен дац. Ткъа Мусаса аьлла дара, иза Делан четар дан волавелча: «Ларлолахь, хьайна лам тІехь гайтинчун кепак тера делахь дерриг а». ⁶ Кхечу динан дайшка деллачул а Ийсага делла динан гІуллакх лакхара хиларе терра, Цуьнан юкьарлонца Делаца бина керла барт а ширачу бартал гІолехь бу, иза тоьлладу чІагІонашна тІехІоттийна болу дела.

⁷ Нагахь санна хьалха бина барт кхачамбацар доцуш хиллехьара, шолгІаниг оьшур а бацара. ⁸ Амма, нахана бехк а буьллуш, пайхамаро боху:

«Текхочуш ду денош, — боху Везачу Эло, —

Аса Исраилан цІийнаца а,

ЯхІудан цІийнаца а

керла барт бен долу.

⁹ Церан дай, куьг а лаьцна, Мисар-махкара арабохучу хенахь,

Аса цаьрца бина барт санна хир бац иза.

ХІунда аьлча цара и Сан барт лар ца бира,

цундела со дІавирзина царна тІера, — боху Везачу Эло.

¹⁰ Иштта барт бийр бу Аса Исраилан халкъаца, хІара денош дІадевлча, — боху Везачу Эло. —

Айса тІедуьллург церан кортош чу дуьллур ду,

церан дегнаш тІехь яздийр ду Аса.

Со церан Дела хир ву,

ткъа царах Сан халкъ хир ду.

¹¹ ХІораммо а шен уллорачунна а,

шен вешина а хьобхур дац:

„Веза Эла вовза“, — бохуш.

ХІунда аьлча массарна а,

хьалдолчунна тІера

къечунна текхаччалц,

Со вевзар ву.

¹² Цаьргара даьлладу вочунна Со кьинхетаме хир ву,

церан кьинош кхин дагадоуьйтур дац Аса».

¹³ Цу бартах «керланиг» а аьлла, хьалха хилларг шира хилар гайтина Цо, ткъа ширделларг кестта дІадолу.

* ^{8:5} ...кхузарчу четар чохь бен ца хуьлу. Я иштта: Цара Далла деш долу гІуллакх кхузарчу гІирсаица бен ца хуьлу. Уьш стигалахь долчун кепак тера бен дац, церан ІиндагІ бен дац.

Лавтта тЕхь а, стигалахь а Далла Тамалъяр

9¹ Хьалха бинчу бертан Далла Тамалъяран бакьонаш а, лавтта тЕхь долу Делан цІа а дара. ² Дина, дахІоттийнера деза четар. Цуьнан хьалхарчу, «еза чохь» олучу декъехь стогар а, даздина баьпкаш тЕхь долу стол а яра. ³ ШолгІачу декъехь кирхьанна тЕхьа «уггар еза чохь» цІе йолу чохь яра. ⁴ Хаза хьожа йогІу хІума яго дашо кхерч а, гонах деши лавцна бартбаран тІорказ а дара цу чохь. ТІорказна чохь кхачанийн буьртигаш чохь долу дашо пхьегІа а, маргІалш хецна хилла йолу АхІаронан Іаса а, бартбаран экьанаш а яра. ⁵ ТІорказна тЕхула тЕмаш а даржийна, кьинош дІадохучу меттехь сийлаллин каруб-маликаш дара лавтташ. ХІинца и дерриг а мадарра дуйцийла яц вайн. ⁶ Цу кепара динчу четаран хьалхарчу цІа чу Далла Тамал ян динан дай боьлху гуттар а. ⁷ ШолгІачу цІа чу шарахь цкба динан коьрта да воьду. Цо шеца цІий дахьа деза чувовдуш, шена а, халкъо ца хууш летийначу кьиношна а тІера даьккхина долу. ⁸ Цу хІуманца Делан Сино гойту Делан четар чу боьду некъ схьабиллина цахилар, хьалхара четар лавтташ мел ду. ⁹ И четар хІинцалерчу заманан билгало ю: совгІаташа а, сагІанаша а Далла Ибадат дечун дог цІандан ца тарло, ¹⁰ уьш даарш а, маларш а кхехьарца а, дегІан меженаш тайп-тайпана йиларца а доьзна бен цахиларна. И дерриг а парзаш, Дала массо а хІума нисдаран зама тЕяллалц, тЕдиллина дара.

¹¹ Дала леррина Кьобалвинарг веара, хІинца хуьлчу диканийн динан коьрта да а волуш. Адамаша дина а доцуш, тоьллачу а, сов кхачаме а долчу четарх чекхвелира Иза (и четар кху дуьненара дац). ¹² Гезарийн а, эсийн а цІий доцуш, Шен цІий а Іанийна, цкба Делан цІийнан уггар езачу чохьна чу а вахана, гуттаренна а вайна паргІатдовлар даьккхина Цо. ¹³ Нагахь эсийн а, гезарийн а цІийно а, дагийначу шинарин чимо а, шайна уьш тЕтоьхча, товрат-хьехамаша ма-бохху, бехбинарш цІанбеш хилча, ¹⁴ цхьа а кьа латийна воцучу, гуттар а долуш долчу Синехула Ша Далла цхьа а томмагІа доцучу сагІина дІавеллачу Дала леррина Кьобалвинчун цІийно мел чІогІа цІандийр ду вай Іо-жалла тЕйюуьйтучу гІуллакхех, дийна волчу Далла лерина вайга Тамал яйтархьама.

¹⁵ Цундела Дала леррина Кьобалвинарг Дала нахаца бинчу керлачу бертан Юкьарлонча ву, хьалхара барт бинчу хенахь наха летийна кьинош дІадаха Цо тЕэцна Іо-жалла бахьана долуш, Дала лур ду аьлла дакьа нахе кхачийтархьама.

^{9:2} Арадаккхар 26:1-30; Арадаккхар 25:31-40; Арадаккхар 25:23-30. ^{9:3} Арадаккхар 26:31-33. ^{9:4} Арадаккхар 30:1-6; Арадаккхар 25:10-16; Арадаккхар 16:33; Лелар 17:8-10; Арадаккхар 25:16; Карлабаьккхинарг 10:3-5. ^{9:5} Арадаккхар 25:18-22.

^{9:6} Лелар 18:2-6. ^{9:7} Тамалъяр 16:2-34. ^{9:13} Тамалъяр 16:15, 16; Лелар 19:9, 17-19.

¹⁶ Нагахь весет* делахь, иза диначун кхалхар а дІагайта дезаш ду, ¹⁷ хІунда аьлча весет стаг веллачул тІаьхьа бен лелош дац. Иза бакьо йолуш дац, нагахь весет динарг дийна велахь. ¹⁸ Цундела хьалха бина барт а цІийца чІагІбина бара. ¹⁹ Товрат-хьехам тІера парзаш дерриг а халкъана хьалха дІа а дешна, хица эдина долу эсийн а, гезарийн а цІий а, шен тІаргІа а, ярийн курс а, схьа а эцна, товрат-хьехаман тептарна а, халкъана а тІе цинцаш туьйхира Мусас. ²⁰ Цо элира: «Дала кхочушбе аьллачу бертан цІий ду хІара». ²¹ Иштта Делан четарна а, Далла Тамал ечу хенахь мел лелочу пхьегІашна а тІе цІийн цинцаш туьйхира цо. ²² Товрат-хьехаме хьаьжжина, дерриг а ала мегар долуш хІума цІийца цІандеш ду, цІий ца Іанийча, гечдар ца хуьлу.

Дала леррина Кьобалвинчун сагІано кьа дІадоккху

²³ Стигалахь долчух тардина кхоьллинарг иштта цІандан деза. Ткьа стигалахь дерг ша а хІокхарал а тоьллачу сагІанашца цІандан деза. ²⁴ ХІунда аьлча Дала леррина Кьобалвинарг билггала долчу уггар а Дезачух тардеш адамийн куьйгаша динчу Делан цІа чу ца вахана, ткьа стигала хьалаваьлла, хІинца вайн дуьхьа Далла хьалха хІотта. ²⁵ Дукхазза а Ша сагІина дІавала ца ваьлла Иза стигала хьала, хІора шарахь а шен доцу цІий а оьций, Делан цІийнан уггар езачу чохьна чу воьду динан коьрта да санна. ²⁶ Иза иштта хилча, дуьне кхоьлличхьана а дуьйна дукхазза а бала хьега дезар дара Дала леррина Кьобалвинчун. Ткьа Иза тІаьхьарчу заманыхь цкба веана Шех даьккхинчу сагІанца адамийн кьа дІадаккха. ²⁷ ХІора адамна, цкба вала а велла, юха кхелана хьалха хІоттар тЕхь ма-хиллара, ²⁸ иштта Дала леррина Кьобалвинчо а Ша цкба сагІина дІавелла хилла, дуккха а адамийн кьинош Шена тЕэцархьама. Ткьа Иза шолгІа, кьинош дІадаха а ца вогІуш, Шега сатуьйсуш болчеран дуьхьа кІелхьардахар тЕэцархьама вогІур ву.

Іийсас даьккхина долу цхьа сагІа гуттаренна а хилар

10¹ Товратан хьехамаш хин долчу диканийн ІиндагІ ду, церан билггал долу васт а доцуш. Цундела хІора шарахь гуттар а дохучу сагІанашкахула цу товрат-хьехамийн Далла гергабогІу нах кхоччуш хилийта ницкь ца кхочу. ² Кхечу тайпана хилча, цара и сагІанаш дохур дацара, хІунда аьлча цкба кьинах цІан а белла, кхин шайн кьинош туосалур дацара царна. ³ Амма сагІанаш дахарца хІора шарахь а кьинош дагадохкуьйту. ⁴ ХІунда аьлча стерчийн а, бежалойн а цІийно кьинош дІадохур дац.

* ^{9:16} *Весет* – грекийн маттахь «барт» а, «весет» а бохучу дешнийн маьІнехь лелаш цхьа дош бен дац.

^{9:19, 20} Арадаккхар 24:6-8. ^{9:21} Тамалъяр 8:15. ^{9:22} Тамалъяр 17:11. ^{9:28} ЕшаІ-ЯхІу 53:12.

- ⁵ Цундела дуьнен чу вогIучу хенахь Дала леррина Къобалвинчо элира:
«СагIанаш а, совгIаташ а ца дийзи Хьуна,
amma Суна дегI кечди Ахьа.
- ⁶ Дийнаташ дагоран а,
къиноих долу а сагIанаш ца тайна Хьуна.
- ⁷ Тпаккха Ас элира: „Хьан Йозанаш тIехь Сох яздина ма-хиллара,
Хьан лаам кхочушбан вогIу Со, Дела“».
- ⁸ Цкъа хьалха Цо боху: «Я сагIанаш а, совгIаташ а, я дийнаташ дагоран а,
къиноих долу а сагIанаш а Хьуна деза а ца дийзи, тан а ца тай» (товрат-
хьехамаша иза тIедуьллуш делахь а). ⁹ Цул тIаьхьа Цо тIетуху: «Хьан лаам
кхочушбан вогIу Со». Хьалхарниг дIадоккху Цо шолгIаниг чIагIдархьа-
ма. ¹⁰ Оцу лаамца даздина ду вай, Дала леррина къобалвинчу Иийсан дегI
цкъа гуттаренна а сагIина даларна.
- ¹¹ Муьлхха а динан да хIора дийнахь Далла Iамал еш ву, цкъа а къинош
дIадахалур доцу цхьатерра сагIанаш Мосуьйттаза а дохуш. ¹² Ткъа Иза,
гуттаренна а къиноих цхьа сагIа а даьккхина, Далла аьтту агIор охьа-
хиьна*, ¹³ Шен когашка Шен мостагIий Дала охьабахккалц, хьобжуш.
- ¹⁴ Цкъа даьккхинчу сагIанца Цо гуттаренна а кхачаме бина базбеш берш.
- ¹⁵ Цунах лаьцна Делан Сино а тоьшалла до вайна кху дешнашца:
- ¹⁶ «Иштта барт бийр бу Аса цаьрца,
хIара денош дIадевлча, – боху Везачу Эло. –
Айса тIедуьллург церан дегнаш чу дуьллур ду,
церан коргош тIехь яздийр ду Аса».
- ¹⁷ Тпаккха Цо тIетуху: «Церан къинош а, харцонаш а кхин дага а йох-
куьйтур яц Аса». ¹⁸ Ткъа къиношна гечдина хилча, царах сагIанаш даха
кхин ца оьшу.

Далла гергакхача дезар

¹⁹ Иштта, вежарий, Иийсан цIий бахьана долуш Делан стигалахь йолчу
цIийнан уггар езачу чойнна доьналла долуш чудаха аьтто бу вайн. ²⁰ Иий-
сас, Шен дегI сагIина дIадаларца, керла некъ схьабиллина вайна цига.
Дийна волу Иийса Ша бу и некъ, ткъа и некъ Делан цIийнан уггар езачу
чойнна дуьхьал оьллина долчу кирхьанах чекхболуш бу. ²¹ Иштта, сий-
лахь динан коьрта да стигалахь долчу Делан цIенна тIехь хIоттийна ву
вайн. ²² ЦIеначу дагаца, чIогIачу тешарца Далла гергахьа кхочийла вай,
цинцаш тохарца вайн дегнаш бехк тIелацарх цIан а дина, вайн догIмаш

* ^{10:12} Я иштта: *Ткъа Иза, къиноих цхьа сагIа а даьккхина, Далла аьтту агIор охьа-
хиьна гуттаренна а.*

^{10:5-7} Забур 39:7-9 (Грекийн). ^{10:11} Арадаккхар 29:38. ^{10:12, 13} Забур 109:1. ^{10:16} Яр-
ми-ЯхIу 31:33. ^{10:17} Ярми-ЯхIу 31:34. ^{10:22} Iамальяр 8:30; Яхьазкхиал 36:25.

цIеначу хица а дилина. ²³ Ваьш сатуьйсург чIогIа лардан деза вай, хIунда
аьлча ваIда Динарг тешаме ву. ²⁴ Вовшийн терго йойла вай, безамна а, ди-
качу гIуллакхашна а ваьш иракара а хIиттош. ²⁵ Вешан гуламаш дIатосуш
ма хуьлийла вай, цхьаболчара иза ма-дарра. Цул а вовшашна гIо дойла
вай, Везачу Элан де гергакхочуш хилар шайна мел ги, алсам а деш.

²⁶ Вай, бакъдолчух дерг а хиьна, къинош ма-луьу летош хилча, къинах
даккха сагIа кхин ма ца дуьсу вайн. ²⁷ Дуьсург цхьаь ду: хинйолу кхел а,
Делан мостагIий дIакхоллу йолу цIе а тIеяре кхерамца хьежар. ²⁸ Муса-
пайхамаран товрат-хьехамаш талхийнарг къинхетам боцуш вуьш ву, на-
гахь шиь я кхоь теш велахь. ²⁹ Ойла ел, мел чIогIа таIзар дийр ду Делан
КIант емалвинчунна, Делаца бина барт чIагIбина а, ша вазвина а долчу
цIийн дозалла ца лериначунна, маьхза дика луш долу Делан Са сийсаз-
динчунна? ³⁰ Вайна хаьа, хIара дешнаш Хьан аьлла:

«Бекхам Соьгахь бу, Ас хьакъ дерг дIалур ду».

Кхин а:

«Везачу Эло Шен халкъана кхел йийр ю».

³¹ Мел кхераме ду дийначу Делан буйна вахар!

³² Дагадакхийта шайн хьалхалера денош, Дала шуна серло еллачул
тIаьхьа, шу, чIогIа баланаш а лайна, чекхдевлара. ³³ ЦкъацIа шу а сий-
саздарца я ницкъ барца нахана хьалха дIахIиттош хилла. ЦкъацIа шаьш
санна ницкъ ловш цхьаьна бала хьобгуш хилла шу. ³⁴ Чубоьхкинчу нахах
къахеташ а хилла шу, шайн долахь дерг дIадаьккхича, хазахеташ а лелла
шу, хIунда аьлча шуна хаьара стигалахь дикаха а, цкъа а дIаер йоцу а хаз-
на шайн юйла. ³⁵ Иштта шайн доьналлех ма доха, хIунда аьлча цунах шу-
на доккха совгIат лур ду. ³⁶ Шуна собар оьшу, Делан лаам кхочуш а бина,
шайна лур ду аьларг схьаэца. ³⁷ ХIунда аьлча:

«Йиснарг кIезиг хан бен ма яц,

тIаккха и ван везаш верг вогIур ма ву –
иза хьелур вац.

³⁸ Амма Аса бакъвинарг Сох тешарца вехар ву,
ткъа иза юхавалахь, Со цунна реза хир вац».

³⁹ Юха а девлла, хIаллакхуьллучарах дац вай, тешарца кIелхьардоху-
чарах ду.

Тешарх лаьцна

11 ¹ Тешар сатуьйсусх долчунна тIехь латтар а, ца гуш долчух шеко йо-
цуш хилар а ду. ² Церан тешар хиларна, Дала хастийна хьалхалерчу
заманахь баьхнарш.

^{10:27} ЕшаI-ЯхIу 26:11 (Грекийн). ^{10:28} Карлабаьккхинарг 17:6; 19:15. ^{10:29} Арадак-
кхар 24:8. ^{10:30} Карлабаьккхинарг 32:35; Карлабаьккхинарг 32:36. ^{10:37, 38} Хьаби-
къукьа 2:3, 4 (Грекийн).

³Тешар хиларна, вай кхета дуьне Делан дашца кхоьल्लीна хиларх, ишт-та гуш дерг цагучух схьадаьлла хиларх.

⁴Тешар хиларна, Хьабула Кхайма чул тоьлла сагIа даьккхира Далла. Цуьнан тешар бахьана долуш Дала, Хьабула деана совгIаташ схьа а эцна, иза Шен лаамехь хиларан тоьшалла дира. Хьабул кхелхинехь а, шен тешар хиларна, кьамел деш ву иза хIинца а.

⁵Тешар хиларна, валар хIун ду ца хууш, стигала хьалаваьккхина ХIанох: «...иза ца карийра, Дала иза дIаэцна дела». ХIанох дIаэцале, Дела цунна реза ву аьлла, тоьшалла до Делан Йозанаша. ⁶Тешар ца хилча, Дела реза войла дац. Далла тIевогIуш верг теша веза Иза хиларх а, Цо Ша леррина лобхучунна совгIат луш хиларх а.

⁷Тешар хиларна, цу хенахь хIинца а ган йиш йоцуш долу хIума Дала шега хайитича, Нохьас, Деле болчу ларамах вуьзна, хинкема дира, шен доьзал кIелхьарбаккхархьама. И тешар хиларна, цо дуьненна кхел йира, ткьа ша Делан лаамехь верг хилира: тешарехула Шена хьалха бакъвина хиларан тIаьхьало елла цунна Дала.

⁸Тешар хиларна, Дала шена тIедиллинарг кхочушдеш, шен дола доккхур ду аьлчачу лаьтта тIе вахара ИбрахIим. Ша стенга воьду а ца хууш, дIавахара иза. ⁹Шен тешар хиларна, шена лур ду аьлчачу лаьтта тIехь Иийна иза, тIевеана стаг хийрачу махкахь санна. Четарш чохь Иийна иза, цуьнца цхьатерра ваДанех тешна волу Исхьакх а, Якъуб а ма-Iарра. ¹⁰Дела суртдиллархо а, гIишлойрхо а волуш, ондачу бух тIехь гIала схьаяре хьобжуш Iара ИбрахIим.

¹¹Тешар хиларна, шен зуда Сарат доьзалхо хуьлуш яцахь а, ша ханна воккха воллушехь, да хиларан хьуьнар тIейицира ИбрахIима*, хIунда аьлча цунна хаьара, Дала Ша аьлларг кхочушдойла. ¹²Цундела цхьа ког коша а бахана волчу стагах схьабевлла, стигалара седарчий а, хIордан берда тIера гIум а санна, дукха нах.

¹³Уьш берриге а, тешар а долуш, белла, лур ду аьлларш схьа а эцаза. Амма царна а хIуманаш гennaхь гина, уьш царах баккхийбеш хилла. Цара шайх лаьцна аьлла, шайш девлла леларш а, тIедаьркина нах а ду лаьтта тIехь. ¹⁴Иштта шайх лаьцна бохучара шайш чубогIу болу мохк шайш лобхуш хилар гойту. ¹⁵Нагахь царан дагахь шайш дIатесна даймохк хил-лехьара, царан хан яра цига юхадерза. ¹⁶Амма уьш тоьлчачу даймакхе

* ^{11:11}Цхьадолчу тептарш тIехь: *Тешар хиларна, доьзалхо хуьлуш яцахь а, ша ханна йоккха йоллушехь, бер даран хьуьнар тIейицира Сарата.*

^{11:3} Доладалар 1:1; Забур 32:6, 9; Яхья 1:3. ^{11:4} Доладалар 4:3-10. ^{11:5} Доладалар 5:21-24 (Грекийн). ^{11:7} Доладалар 6:13-22. ^{11:8} Доладалар 12:1-5. ^{11:9} Доладалар 35:27. ^{11:11} Доладалар 18:11-14; 21:2. ^{11:12} Доладалар 15:5; 22:17; 32:12. ^{11:13} Доладалар 23:4; 1 Шерашкахь 29:15; Забур 38:13.

сатесна бу – стигаларчу даймакхе. Цундела, наха Ша царан Дела ву аьлча, Далла эхь ца хета: Цо царна гIала кечийна.

¹⁷Тешар хиларна, ИбрахIима, ша зийча, сагIа даккха Исхьакх валийна. Шена лур ду аьлларш тIеэцнехь а, шен цхьаь бен воцу кIант сагIина давала резахилла иза. ¹⁸Цу кIантах лаьцна аьлла хилла: «Исхьакхах хир ю хьан тIаьхье». ¹⁹ИбрахIимна дагахь дара, Делан ницкь бу велларг а денван аьлла – ткьа цо шен кIант веллачуьра санна схьайицира.

²⁰Тешар хиларна, Исхьакха декьалвира Якъуб а, Iесав а, царан хиндолчуьнга хьаьжжина.

²¹Тешар хиларна, ша леш, Якъуба декьалбира Юсупан кIентий, шен Iасанна тIе а вазлуш, Далла Iамал йора цо.

²²Тешар хиларна, Юсупа, ша лечу хенахь, исраилхой Мисарара арабевр бу аьлла а дейицира, шен даIахкех весет а дира.

²³Тешар хиларна, Муса вича, цуьнан дас-нанас кхаа баттахь лечкьош лелийра иза, хIунда аьлча царна гора бер хаза хилар. Паччахьан омранах кхера ца белира уьш.

²⁴Тешар хиларна, ша воккха хилча, пирIунан йоIан кIант ву ала дуьхьал хилира Муса. ²⁵Делан халкьаца халонаш лан резахилира иза, йоцчачу ханна долу кьилахь самукьадалар лелочул. ²⁶Дала леррина Кьобалвинчун сийсазвар шена доккхаха хьал лерира Мусас Мисар-мехкан хазнел а. Иза шена лун долчу совгIате хьобжура.

²⁷Тешар хиларна, Мисар-мохк дIатесна цо, паччахьан оьгIазаллех а ца кхоьруш, хIунда аьлча, ца гуш Волчуьнга хьобжуш санна, доьналла долуш вара иза. ²⁸Тешар хиларна, нахе Пасахьан деза де кхочушдайтира цо, цIийн цинцаш неIаран гурашна тIе а деттийтира цо, исраилхойн дуьхьара хилла бераш мулкалмоте хIаллак ца дайта.

²⁹Тешар хиларна, лаьтта тIехула санна, Шечу хIорда чухула дехьабевлира уьш. Изза дан гIоьртина мисархой хи буха бахара.

³⁰Тешар хиларна, Ерихон-гIалин пенаш охьайигира, исраилхоша царна ворхI дейнахь гонаш даьхча. ³¹Тешар хиларна, Далла муьтIахь боцучу кхечу нахаца хIаллак ца хилира гIалане хьовса кьайлаха баьркина исраилхой тIелаьцна йолу, нахаца лела Рахьаб.

³²Кхин хIун эр дара ас? Хан тоьар яц суна ГадIанах а, Баракках а, Шамшонах а, Яптахьах а, Даудах а, Шамьалах а, пайхамарех а лаьцна

^{11:17} Доладалар 22:1-14. ^{11:18} Доладалар 21:12. ^{11:20} Доладалар 27:27-29, 39, 40.

^{11:21} Доладалар 48:1-20; Доладалар 47:31 (Грекийн). ^{11:22} Доладалар 50:24, 25; Арадаккхар 13:19. ^{11:23} Арадаккхар 2:2; Арадаккхар 1:22. ^{11:24} Арадаккхар 2:10-12.

^{11:28} Арадаккхар 12:21-30. ^{11:29} Арадаккхар 14:21-31. ^{11:30} ЮшаI 6:12-21. ^{11:31} ЮшаI 6:22-25; ЮшаI 2:1-21. ^{11:32} Куьйгалхой 6:11-8:32; Куьйгалхой 4:6-5:31; Куьйгалхой 13:2-16:31; Куьйгалхой 11:1-12:7; Шамьал 16:1 – Сулим 2:11; Шамьал 1:1-25:1.

дийца. ³³Тешар хиларна, пачхьалкхашна тЕхь толамаш а бохуш, нийсо а лелайойтуш, Дала лур ду аьлла хУманаш схьа а оьцуш, лобмийн баганаш дIа а кьовлуш, ³⁴буьрса цЕ а йойуш, ирачу туьрах кIелхьар а довлуш, гIелделча, дегIе ницкь а богIуш, тIамехь онда а хуьлуш, мостагIийн эскарш а лохкуш, хилла уьш. ³⁵Тешар хиларна, зударша шайн делла бераш, ден а луш, схьаоьцуш хилла.

Цхьаберш, ницкь а беш, бойуш хилла, амма цара паргIато схьаоьцуш ца хилла, тоьлчачу дахарехь шайн дендалар хилийтархьама. ³⁶Кхечара сийсаздар а, еттар а, буржалш а, набахти а лайна шайна тЕхь. ³⁷Царна тIулгаш а кхуьсура, уьш херхашца хеда а бора, таррашца байа а бойура. Чудаха цIа а доцуш, уьстагIийн а, гезарийн а кхекхий а хьерчийна, лелла уьш, халонаш а, баланаш а, наха шайна беш болу ницкь а ловш. ³⁸Дерриг а дуьненал лакхара болу уьш яьссачу аренашкахула, лаьмнашкахула, хьешкахула, Iаннашкахула бевлла лелара.

³⁹Тешар хиларна, Делера баркалла хилла царна, амма лур ду аьлларг схьа ца эцна цара. ⁴⁰Дала вайна цхьа тоьлла хУма билгалдаьккхинера, уьш вайца цхьаьна бен кхачаме ца хилийтархьама.

Дела Да ву

12 ¹Цундела, гонах тешийн бIо хиларна, ваьшна тIера массо а новкьарло а, ваьшна гонах хьаьрчаш долу кьа а дIадокхийла вай. Доьналла а долуш, ваьшна хьалха хуьлчу кьийсаман новкьахула дIадовдийла вай, ²тешар кхоьблина а, кхочушдина а волчу Iийсана тIе а хьожуш. Цо Шена хин долчу хазахетаран дуьхьа жIари тIехь валар лайра, эх тIе дар тергал а ца деш, нехан кхардам тидаме а ца оьцуш. Ткьа хIинца Иза Делан паччахьан гIантана аьтту агIор, баьрччехь, хиьна Iаш ву.

³Кьинош летийначу нахера сел чIогIа кьизалла Лайначун ойла ел аш, шаьш доьналла доцуш ца диса а, дог эшна ца хилийта а. ⁴Кьинна дуьхьал а девлла, цIий Iаннол чIогIа латар ца хилла шун хIинца а. ⁵Делан кIентий долчу шуьга, шу иракарагIиттош, аьлла дешнаш диц-м ца делла шуна?

«Сан кIант! Везачу Эло дечу таIзарх ца вешаш ма хила, гIайгIане а ма вожа, Цо хьо харцвахь».

⁶ ХIунда аьлча Шена везаш верг, таIзар а деш, нисво Везачу Эло.

Ша тIеоьцуш волчу кIантана етта а етта Цо».

⁷Шаьш нисдеш долу таIзар ла, хIунда аьлча оцу таIзар даро гойту, Дала шу кIентий санна хетар. ХIунда аьлча дас нисдеш долу таIзар даза кIант хир а вуй? ⁸Ткьа массо а кIантана деш долу таIзар шуна деш дацахь, шу кIентий дац, шу кьотIалгIагина бераш ду. ⁹Нагахь вайна таIзар деш

^{11:33} Даниал 6:1-27. ^{11:34} Даниал 3:1-97. ^{11:35} Сулим 17:17-24; Сулим 4:25-37.

^{11:36} Сулим 22:26, 27; 2 Шерашкахь 18:25, 26; Ярми-ЯхIу 20:2; 37:15; 38:6.

^{11:37} 2 Шерашкахь 24:21. ^{12:5}, ⁶ Аюб 5:17; Кицанаш 3:11, 12 (Грекийн).

болу дуьнен чуьра дай вай лоруш хилча, синойн Дена кхин а чIогIа муьтIахь хила ца деза вай, дахар хилийтархьама? ¹⁰Вукхара шайна дика хетачу агIор кIезигчу ханна таIзар дора вайна, ткьа Кхо – вайна пайда хилийта, вайга Шен возаллехь дакьа лацийта до. ¹¹Карарчу хенахь муьлхачу а таIзаро самукьадалар ца дахьа, сингаттам бен. Делахь а тIаьхьа цуьнгахула нисбеллачара машаре а, Делан лаамехь а долчу дахаран стом буур бу.

Хьехамаш а, лардарш а

¹²Цундела хьалаайа шайн охьадахана куьйгаш, чIагIье шайн малъелла голаш. ¹³Нийсачу новкьахула лела, астагIа лелхарш гал ца бовлийта, мелхо а тобалийта.

¹⁴Массо а адамца машаре хила, ткьа Далла гергахь цIена хила хьовса. Ценалла ца хилча, цхьанна а Веза Эла гур вац. ¹⁵Кьаьсттина тидаме хила шайна юкьара цхьаь Делан диканаш дIа ца кьастийта, «кьаьхьачу орамех дIаьвше маргIал хьала а даьлла, цуьнга дуккха а нахана зен ца дайта». ¹⁶Шуна юкьахь, боьха хУманаш лелош а, Iесаваялла а стаг ца хилийта, Iесав санна, цкьа юочу хУманах хьалха дуьнен чу ваьлчачун бакьо дIалуш. ¹⁷Шуна хаьа, цул тIаьхьа Iесавана лиира дас ша декьалван, амма иза дIатесна хилира. Цуьнга хIумма а ца хийцаделира, воьлхуш, цо дехарш дича а.

¹⁸Шу герга ца даьккина куьг Iоттал уллохь болчу а, цIе летта богучу а ламанна а, Iаьржачу боданна а, чIогIачу махана а, ¹⁹лохкучу маIан озана а, деш долчу кьамелана а. И кьамел хезачара дехарш дора, кхин шайга дош ма алахьара бохуш. ²⁰ХIунда аьлча цаьрга лан ца лора шайна тIедожош дерг: «Нагахь хьайба а ломах дIахьакхалахь, цунна тIулгаш кхисса деза, иза хIаллакьхиллалц». ²¹Царна гуш дерг сел буьрса хиларна, Мусас ша а элира: «Со кхоьруш а, вегош а ву».

²²Амма шу тIедахана Цийон-ламанна, дийначу Делан гIала йолчу стигаларчу Ярушалаймана, эзарнаш маликийн ²³самукьанечу гуламна, стигалшкахь цIераш дIаязийнчу Делан дуьхьарчеран леррина болчу гуламна, массеран Кхелахо волчу Далла, кхачамалле кхачначу Делан лаамехь болчеран синошна, ²⁴керлачу берган Юкьарлонча волчу Iийсана, Хьабулан цIийнал а дика кхьаь буьйцуш долчу, тIехьорсучу цIийн цинцашна.

²⁵Хьовсалаш, кьамел Дечуьнгахьара дIа ма дерзалаш. Нагахь, Лаьтта тIехь кьамел дечуьнга ла а доьгIна, уьш а кIелхьара ца бевллекь, вай муьхале а кIелхьардевр дац, стигалара кьамел Дечуьнгахьара дIадержахь. ²⁶Цу хенахь Цуьнан озо Латта дегийра, ткьа хIинца Цо боху: «Ас кхин

^{12:12} ЕшаI-ЯхIу 35:3 (Грекийн). ^{12:13} Кицанаш 4:26 (Грекийн). ^{12:15} Карлабаьккхинарг 29:18 (Грекийн). ^{12:16} Доладалар 25:29-34. ^{12:17} Доладалар 27:30-40.

^{12:18}, ¹⁹ Арадаккхар 19:16-22; 20:18-21; Карлабаьккхинарг 4:11, 12; 5:22-27.

^{12:20} Арадаккхар 19:12, 13. ^{12:21} Карлабаьккхинарг 9:19. ^{12:24} Доладалар 4:10.

^{12:25} Арадаккхар 20:22. ^{12:26} Хьагай 2:6 (Грекийн).

цкъа а, Латта дегийна ца Iаш, стигал а егор ю». ²⁷ «Кхин цкъа а» бохучу дешнаша гойту дегалуш дерг (и ду кхоьллинарг) дIадаккхар, ца дегалуш дерг дисийтархъама.

²⁸ Цундела вай, егалур йоцу пачхьалкх тIеоьцу ерш, Далла баркалла олуш хила деза. Баркалла а долуш, Цунна товш йолчу кепара Далла Iамал ян еза вай, ларамах дуьзна а, кхоьруш а долуш, ²⁹ хIунда аьлча «вайн Дела массо а хIума дIахьулгеш йолу цIе ю».

Дела реза муха виър ву вай

13 ¹ Шайн динан вежаршка болу безам даим латтабе. ² Хъаша тIеэцар а диц ма де, цхьаболчара шаьш долчохь маликаш тIе ма оьцура, уьш муьлш бу а ца хууш. ³ Дагахь латтабе набахти чохь берш, шаьш цаьрца цхьаьна долуш санна. Дагахь латтабе Iазапехь бохкурш, шайн догIмашкахь шаьш баланахь хьобгуш санна.

⁴ Массара а майрачун-зудчун юкъаметтиг ларье, шаьш дIадуйшу мотт сийсаз ма баккха. Дала кхел йийр ю сийсазала лелочарна а, нахаца лелачарна а.

⁵ Ахчанна тIаьхьадовлий ма лела, шайн долчух тоам бе. Дала Ша ма-аьлла:

«Ас цкъа а вуьтур вац хьо,
хьох къабстар а вац Со».

⁶ Цундела вай майрра боху:
«Веза Эла ву сан гIоьнча,
со хIуманах а кхоьрур вац.

ХIун дийр дара суна стага?»

⁷ Делан дош шайна довзийтина болу шайн куьйгалхой дагахь латтабе. Церан дахаро кхиадиначуьнга хьовса, церан санна тешар хилийта. ⁸ Дала леррина къобалвина Iийса селхана а, тахана а, массо а хенахь а Ша Верг ву. ⁹ Тайп-тайпанчу а, хийрачу а хьехамашка ма марзло. Делан диканца шайн дегнаш чIагIдар гIоле ю, хIума яаран парзаш кхочушдарал. Уьш кхочушдечарна пайда ца хуьлу.

¹⁰ Вайн сагIа доккху кхерч бу, цу тIера хIума яа бакьо яц кху дуьненахь долчу Делан цIа чохь гIуллакх деш болчеран. ¹¹ Къинах долчу сагIина дайинчу дийнатийн цIий динан коьртачу дас Делан цIийнан уггар езачу чоьнна чу хьо, ткъа церан чархаш меттаматтал арахьа ягайо. ¹² Иштта Iийса а, Шен цIийца нах базбархъама, гIалин кевнал арахьа бала лайра. ¹³ Меттаматтал арахьа Иза волчу арадовлийла вай, Цуьнан сийсазвар тIе а лоцуш. ¹⁴ Кхузахь вайн гуттар а лаьтгаш йолу гIала яц, вай хин йолу гIала лохуш ду. ¹⁵ Iийсагахула гуттар а Далла лерина хасторан сагIа

доккхийла вай, я, кхечу тайпана аьлча, Цуьнан цIе хастош болу вешан берган стом лойла вай. ¹⁶ Диц ма делаш диканиг дан а, вовшашна оьшург шайна юкъахь декъа а, хIунда аьлча иштта сагIанаш Далла тамехь ду.

¹⁷ Шайн куьйгалхоша бохург а де, царна муьтIахь а хила, хIунда аьлча уьш массо а хенахь шун гIайгIа беш бу, Далла хьалха шайн шух жоп дала деза дела. Шаьш деш дерг хазахетарца дойла цара, даккхий синош а ца дохуш. Иза иштта ца хилахь, шуна цхьа а пайда бац.

¹⁸ Тхох лаций доIанаш де. Тхо тешна ду тхайн дегнаш цIена хиларх, хIунда аьлча массо а хIуманна тIехь хьанал хила гIерта тхо. ¹⁹ Къабсттина доьху шуьга доIа дар, Дала со сиха шайна тIе юхаверзорах лаций.

ДоIанца дерзор

²⁰ Шен цIийца гуттар а болу барт чIагIбина волу вайн Веза Эла Iийса, уьстагIийн сийлахь Iу, веллачуьра денвинчу, синтем болчу Дала, ²¹ Шен лаам кхочушбархъама, муьлхха а дика хIума лойла шуна. Дала леррина къобалвинчу Iийса-Элехула Шен тамехь дерг вайна чохь кхуллийла Цо. Сийлалла хуьлийла Цуьнан ерриге а хенахь. Амин.

Дерзоран дешнаш

²² Ас доьху шуьга, динан вежарий, хIокху иракарахIотторан даше со-барца ладогIар, яздинарг башха дукха а дац. ²³ Цхьа кхаь бу шуна: вайн ваша Тимапи паргIатваьккхина. Иза кестта схьавагIахь, цуьнца цхьаьна суна шу гур ду.

²⁴ Шайн массо а куьйгалхошка а, берриге Делан нахе а маршалла ло. Италерчу динан вежаршкара маршалла ду шуьга.

²⁵ Делан дика хуьлда шуьца массаьрца а.

^{12:29} Карлабаьккхинарг 4:24. ^{13:2} Доладалар 18:1-8; 19:1-3. ^{13:5} Карлабаьккхинарг 31:6, 8; ЮшаI 1:5. ^{13:6} Забур 117:6 (Грекийн). ^{13:11} Iамалъяр 16:27.